

**Zeitschrift:** Igl Ischi : organ della Romania (Societat de Students Romontschs)  
**Herausgeber:** Romania (Societat de Students Romontschs)  
**Band:** 32 (1946)

**Nachruf:** Major Pieder Anton Vincenz : a. derschader cantonal  
**Autor:** Durgiai, E.

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 02.04.2026

**ETH-Bibliothek Zürich, E-Periodica, <https://www.e-periodica.ch>**

## † Major Pieder Anton Vincenz

### a. derschader cantonal

Igl ei pauc si pauc giu in tozzel onns, ch' igl autur de questa mudesta undrientscha ha fatg si' emprema viseta sco giuven student della giurisprudenza al venerau veteran dils advocats sursilvans: a mistral e major Pieder Anton Vincenz a Trun, da gliez temps aunc derschader cantonal en uffeci. Cun usitada creanza e curtesia ha il distinguüu commember dil suprem tribunal cantonal retschiert il niev discipel dil dretg e beneventau el sco pli giuven collega. E per motto dil futur representant dil dretg ha el dau la devisa dil grond giurist roman Ulpian: «iuris praecepta sunt haec: honeste vivere, alterum non laedere, suum cuique tribuere». Ei para a nus, che questa maxima, la quala impona als survients dil dretg il treidubel duer: de viver honest, de buca violar il proxim e ded attribuir a scadin il siu, seigi oravontut stada il principi ed igl ideal, che ha dirigiü il preziau defunct en tut siu far e demanar, en siu operar public, sco era en sia veta privata. Daveras, in tal um e burgheis ha meritau in pèr plaids de regurdientscha sur sia fossa ora!

Naschius ils 27 de mars digl onn 1867 sper igl ischi a Trun sco descendent d' ina veglia famiglia sursilvana cun il dretg de burgheis en quella vischnaunca de gronda tradiziun historica, ha P. A. Vincenz visitau la scola primara dil vitg patern e silsuentter absolviu il gimnasi humanistic alla scola claustrala de Mustér ed al collegi de Sviz. Cheu eis el intraus ella Societad de students svizzers, sco quei ch' el ei era staus in pèr onns pli tard sper la tgina della «Romania». A quellas duas uniuns studenticas ha el manteniu sia affecziun e fideivladad entochen la mort! Dotaus abundantamein cun duns e talents per la veta publica ei igl abiturient sedecidius per il studi della giurisprudenza ed ei per quei intent serendius per 6 semesters allas universitads de Strassburg e de Berna. Il giurist, che banduna la scol' aulta ei denton aunc buc in advocat. Pér la veta pratica fuorma il procuratur dil dretg. Per quei motiv ha il giuven giurist Vincenz aunc absolviu in practicum de dus onns el renomau biro d' advocatura dil procuratur public, Leci Caffisch a Cuera. Cheu ha — gl' onn 1891 — il pievel della Cadi clamau a casa

igl advocat e gia quei onn delegau el sco deputau en nies parlament cantonal, el Cussegl grond, dil qual el ha priu part 1 decenni. Naven da quei mument ha ina nomina suandau l' altra, aschia ch'igl advocat Vincenz ha bein exercitau el decuors dils onns la gronda part dellas scharschas e dils uffecis, ch' il cumin ha ded occupar. 1892 ei Vincenz vegnius numaus ufficial de stumadira e concuors e 1893 — en ina vegliadetgna de mo 26 onns — elegius mistral della Cadi. Naturalmein ei era la vischnaunca de Trun seprofitada della capaciad digl advocat e politicher ed ha mess 3 gadas en ses mauns il tgamun della communitad, la quala el ha empalau en tut 10 onns. En quellas 5 periodas ha igl iniziativ president revediu ed elaborau quasi l' entira legislaziun communal e scaffiu 2 costituziuns, 1903 ina per il sistem collegial e 1915 ina tala per il sistem departemental della suprastanza. Era igl archiv communal ha mistral Vincenz reorganisau ed indrizzau danovamein. Duront varga 30 onns ha el funzionau sco commissari de polizia dil district Reinanteriur e buca meins che 3 decennis ha el fatg part de nies suprem tribunal cantonal, ils emprems 15 onns ella qualiad de suppleant della combra civila e della combra d' accusaziun ed ils suandonts 15 onns (1920—1936) sco derschader cantonal.

Sgr. major Vincenz era in derschader de vaglia, buc in sentimentalist, mobein gests e conscienzius. Siu pareri era adina beinfundaus, segirs e serius. Enconuschenta era sia nunpartischontadad nunballucconta e sia discreziun nundispiteivla: in derschader suenter la veglia dil Segner! Sper tut ses uffecis ha sgr. major Vincenz ina liunga veta practicauc sco valent procuratur dil dretg. Igl advocat Vincenz era buc amitg de rampins e specialist de strubigems. Sia forza er'ina vasta e profunda savida giuridica ed ina eloquenza impressiunonta. Era en sia advocatura snegava el buca il derschader grad e sincer. — Sias capacitads giuridicas ein vegnidas renconuschidas da nossas autoritads cantonalas e federalas. Advocat Vincenz ei vegnius incaricauc cun la translaziun en romontsch della Lescha federala de stumadira e concuors, dil Dretg d' obligaziuns ed en cuminonza cun siu amitg, sgr. professor d' universitad Dr. Pieder Tuor, era dil Cudisch civil svizzer, lavurs de gronda precisiun e preziusadad.

Pieder Anton Vincenz possedeava era tuttas premissas per la carriera militar. Cunzun siu temperament resolut ha aviert ad el la via militar. Cun 20 onns litinent d' infanteria, ha el ladinamein ascendiu la scala hierarchica tochen il grad de major. In diember d' onns ha major Vincenz era apparteniu a nossa dertgira militar territoriala. Major Vincenz fuva in officier de

tempra marziala, mo de bien cor. El era bein la personificaziun della disciplina e subordinaziun, mo el veseva era en scadin schuldau il carstgaun e burgheis, sco quei ch' ei descha ella democrazia cun siu sistem della milissa.

La personalitad ed activitad dil mistral, major e derschader Vincenz tunschevan denton aunc pli lunsch e sin ulteriurs territoris della scienza e della veta. Senza dubi il pli enconuschents eis el daventaus sco valent historicher e historiograf. Ina admirabla collecziun de lavurs historicas en lungatg romontsch e tudestg dat perdetga della gronda savida e seriusa scrutaziun dil historiograf sursilvan. Il spazi consentiu a nus scamonda ded enumerar tut ils fretgs della premura e della plema dil defunct. Nus alleghein sulettamein las lavurs egl «Ischi» ed ellas «Annalas della Societad Retoromontscha» davart las minieras a Trun, l' alp Russein de Trun, il scolaesser en la vischnaunca de Trun, ils Landrechtlers della famiglia de Lumbrins e l' administraziun dil pauperesser de Trun, davart la dertgira nauscha, la publicaziun della cumedia veglia «Il servitur de dus patruns», la convenziun dils interprendiders della via en val de Medel cun las vischnauncas della Cadi, la publicaziun della tragedia «La Jezabela», il regiment svizzer de Roll en survetsch ingles, fuormas de seraments pils officials della Ligia Grischa e pils officials dil cumin-grond della Cadi e finalmein la historia della vischnaunca de Trun. En lungatg tudestg ein comparidas el decuors dils onns la lavur davart ils castials de Fryberg e Zignau sper Trun, l' enconuschenta scartira festiva per la fiasta centenara della Ligia Grischa a Trun 1924, sco era las contribuziuns egl organ della Societad historic-antiquara dil Grischun davart ils officiers della famiglia de Caprez-Trun e dus officiers della famiglia Vincenz-Schlans en suvetsch franzos. Buca d' emblidar ein ils numerus artechels, ch' il historicher de Trun ha concepiu per il grond lexicon historic-biograf della Svizzeria sur de triep famiglias indigenas. Senza dubi la cruna della lavur scientifica de sgr. major Vincenz ei denton sia eccellente «Historia della vischnaunca de Trun», in exempel d' ina historia locala, conscienziusa e cumpleta. Tut ensemen ha P. A. Vincenz relaschau ina raccolta scientifica de vaglia, che havess en autras relaziuns purtau agl autur la capiala de docter d'honor. — Sper quei fritgeivel operar litteraric ha il defunct per tozzels occasiuns funzionau sco oratur festiv e valent referent e delectau ses auditurs cun sia savida e sia memoria fenomenala. Honorifica menziun vulein nus era far dil grond interess e dellas stentas e breigias, ch' il major de Trun ha attribuiu alla renovaziun della caplutta de S. Onna,

della cuort Ligia Grischa e ded auters monuments historics dell' anteriura capitala della Ligia. Ni temps ni lavur pudevan stermentar el, cura ch' ei haveva num de salvar la tradiziun, il lungatg e la cultura dils babuns.

Il maletg de major Pieder Anton Vincenz fuss superficials e munclus, designassen nus buc era sia tempr personala zun originala. Gia siu exteriur annunziava la personalitad extraordinaria. In tgau marcant, moviments de temperament ed ina vusch de zenn grond fagevan impressiun a pign e grond. Aunc en sia aulta vegliadetgna snegava el buc igl anteriur officier. Mo quella comparsa marziala era la sedia d' in spert e caracter ual schi distinguu. Major Vincenz era il meister della conversaziun, uras en ed uras ora saveva el divertir e tener si da frestg entiras tablas. Buca de sesmarvegliar, che major Vincenz era culs onns daventaus ina enconuschenta ed aultstimada personalitad lunsch entuorn e che sias relaziuns amicablas tunschevan tochen els pli aults cercchels. E tgei far curvien, sche l' originalitad digl um dil pievel era daventada gia bein baul igl obiect de tschupel bialas anecdotes? Il zenn de miert, che ha annunziou ils 8 d' avrel 1945 la mort tut anetga dil pli vegl mistral della Cadi ha perquei leventau vivs sentiments de tristezia e fideivla regurdientscha. Pieder Anton Vincenz ha en in liunga veta verificau la devisa: «honeste vivere, neminem laedere, suum cuique tribuere» e vegn grazia a sia ferma personalitad e ferventa activitad a restar en fideivla memoria de ses contemporans.

---

Dr. E. Durgiai.